

FUGITIVO DAAL A ENTREGA SU MES

Colombianonan lo cruza laman caba!

ORANJESTAD (AAN): Tabata Diamars madrugá, djis despues di mey anochi cu sorpresivamente e fugitivo Richard Daal a presenta dilanti porta di Prison di KIA na San Nicolas.

E ta un di e tres fugitivanan cu a logra di burla seguridad den e Instituto algun dia pasa y a logra di huy den scuridat.

Ya ta bay pa dos siman caba cu e huymiento espectacular aki a tuma lugar. For di e dia ey no tabatin ningun

informe adicional di unda nan por ta!

Mientras tanto hasta e mama di Richard a worde notifica cu su yiu a regresa KIA sano y salvo. Manera por corda, e mama algun dia despues su yiu a huy for di e instituto a bin Aruba na unda el a suplica publicamente pa e yiu fugitivo entrega su mes na autoridadnan locual. Awor e Mama lo ta mas tranquil, como cu realmente ta algun siman mas so e yiu tabatin pa keda deteni.

Mientras tanto informa-

cionnan ta muestra cu tanto Recherche y Landsrecherche lo ta encarga pa interrogacion. Esaki riba su mes ta un fenomeno poco straño, como cu segun informe Landsrecherche ta worde envolvi solamente si ta trata un caso na unda ambtenaar lo ta envolvi.

No ta conoci te ainda si acaso tin funcionario den Prison di KIA mes cu lo ta sospechoso, y si pesey a dicidi di envolvi Landsrecherche den e investigacion.

Pero e forma di traha banda di otro di e dos Departamentonan aki ta poco inexplicable. Por corda ainda di e aparentemente plan cu Ministro Vos tin pa incorpora Landsrecherche den Cuerpo Policial Arubano.

No por ta asina cu e dos identidadnan cu ta cay bao di Procurador General ta manera un "yoyo" cu ta spera riba orden ta kende lo ta envolvi pa investiga.

Awor ta surgi e pregunta ta kende su tarea tabata pa busca e fugitivanan: E

guardianan di KIA? Agentenan di Cuerpo Policial? Of kizas ta Landsrecherche? E ultimo lo a worde encarga pa investiga e fuga den KIA, mientras cu Recherche mes cu realmente mester ta envolvi... "apenas" lo a haya tende algo concreto riba e fuga.

Ta di spera cu riba corto plazo e Ministro envolvi hala Procurador General un banda y notifique cu Política di Justicia ta muestra cu Gobierno ta carga responsabilidad, como cu ora cos bay robez ta den Staten e Ministro tin cu duna cuenta.

No por ta asina cu nan ta hung cu e maneho di Ministro. Claro cu por delibera con lo bay funciona hunto... pero no banda di otro! Esaki no por!

Si ta ley lo tin cu cambia, e mester bay tuma lugar pa asina tin un claridad, pa asina e wega di "yoyo" por yega na un fin.

Pa loke ta trata Richard Daal mes, segun informe e no a regresa man bashi. E lo

mester tabatin mas Dollar den su poder ya cu \$200 a worde haya.

Informacionnan cu DIARIO a logra acumula ta muestra cu despues cu e trio lo a huy for di Prison di KIA, nan lo a ricibi lift pa districto di Santa Cruz.

Aparentemente lo tabatin ciudadano cu lo a duna un man pa sconde nan, y pa despues yuda e dos Colombianonan fugitivo cruza laman Caribe.

Tur esakinan lo tin cu bay worde investiga profundamente pa asina autoridad pone man riba un of mas persona cu lo a yuda den e fuga.

Manera ta bien conoci cu e fuga no a bay di un dia pa otro, e tabata plan bon prepara y poni den otro. Tanto pafor y posiblemente paden e grupo di 5 lo por a haya ayudo. Sinembargo na tempo dos preso a worde gara den KIA mes na momento di e intento.

Pues por bisa cu Richard Daal a regresa, pero e otro dosnan ainda ta "perdi".

PUEBLO DI ARUBA KIER PA STOP COASTAL DI COMETE ABUSO

ORANJESTAD (AAN) -- Pueblo di Aruba a keda masha asombra cu loke nan a lesa den DIARIO tocante e poder cu COASTAL tin na Aruba y con nan a pone 3 trahador Filipino abordo di avion, sin cu ningun tramitacion a worde haci via Oficina di Labor, manera otro companianan estableci na Aruba si tin cu haci promer cu kita trahador, sea of no stranhero.


Tambe diferente lector a tuma nota di un entrevista cu DIARIO a sostene cu Ministro di Labor, unda cu el a bisa cu gobierno lo exige COASTAL cumpli cu nos leyman di trabao, y cu cierto contractnan di trabao e multinacional aki lo no por sigui haci.

Pesey mes e noticia a causa un impresion fuerte den nos comunidad, pa motibo cu si gobierno anterior a laga COASTAL haci y deshaci y pone nan sinti manera doño nan ta di Aruba, esnan cu ta bini di afo no tin fout y no tin pakico paga e consecuen- cianan.

Nos comunidad ta spera cu gobierno cumpli cu su

promesa di interveni na unda cu nan por interveni y baha e poder di COASTAL pasobra no ta husto cu cosnan asina sosode riba nos Isla, unda e compania aki ya caba ta cometiendo demasiado abuso!.

100.000 BOE BOE!!!



Telefon di
DIARIO

26747